



Árvvsaž joukkpiârpei'vvpäi'kk' Miessi personkå'dd, Enontekiö kåå'dd vöboršee'kk' da kue'ss.

Sää'm'kiõllsuávtõs lij tu'mmjam miõttâd ta'nni kiõllcistt –ciist Enontekiö kåå'dd joukkpiârpei'vvpäi'kk' Miessja.

Tât cistt da ták sk'iânk liâ peä'cc vue'ddin njõddum vuä'ddnää'pp; vuä'ddču'kk' loo'kk'in, vuä'ddtiskk da säähharne'cc.

Peä'ccest šõddi vue'ddi miârkk'tõs lij peäcca seämmanallšem, ko sää'm'kiõl miârkk'tõs sä'mmlaid da sää'mkulttuu're. Peä'ccest šõddi vue'dd tuõ'll'je pie'cc ceäggad da jie'llemviõkksânji, seämmanalla ko sää'm'kiõll âänn sää'mkulttuur da sää'mõhttsažkåå'dd jie'llemviõkksânji. Sää'mkulttuur jie'llem-mäi'nn lij sää'm'kiõl seillmõš puõ'tti puõlvvõõggid da kiõll lij sää'mkulttuur vääžnmõs vuä'ss, tõt lij sää'mkulttuur väimm. Sää'm'ä'rbteätt lij ra'vves te'l, ko tõt lij kulttuursaž da kiõll'laž õhttvuõdâst.

Sää'm'kiõlluâjj ciist miârkk'tõs lij u'vded tobdstõõzz sää'm'kiõllsaž kääzzkõõzzi da sää'm'kiõl staattuuzz ooudâsviikkmõõžžâst tuejjuum miõttlâž tuâjast Lää'ddjânnmest.

Sää'm'kiõlluâjj-ciist miõttât Enontekiö kåå'dd joukkpiârpei'vvpäi'kk' Miessja puõ'ttinallšem vuâdai mie'ldd:

Joukkpiârpei'vvpäi'kk' Miessi lij miõdlõsân čõõd'tam tuâimmjumuužžstes saa'mi'kiõll'laž vuõiggâd'vuõd'id da viikkâm ooudâs sää'm'kiõl staattuuzz da tøn ruõkkmõõžž.

Joukkpiârpei'vvpäi'kk' Miessi lij šiõgg ooudâsjoo'tti čuä'jteei tõ'st, mõõnnalla u'cc resuurssivui'm da ääi'j mie'ldd si'tkkes tuâjain vue'i'tet vuâžzad äigga kookkas kuõ'ddi da miârkk'šõõvvi tuâjaid sää'm'kiõl se'rddmõõžžâst nu'tt, što kiõl iskrdeei jie'llemiiskâr lij ruõkkum veä'lkõs puõlvvõõggi tuâkka, ij-ga kiõll kuõd'du rainnâd.

Joukkpiârpei'vvpäi'kk' Miessi lij tuâimmjam Enontekiöst 10 ee'kked da tøn äi'g'gen Miessi lij hâiddam ee'jji mie'ldd âlddsin 40 sää'mpä'rnned, jooukâst liâ nijddpää'rn da ååumpää'rn. Enontekiö kå'dd kooll sää'm dommvouda da kåå'ddest sää'm'kiõllsaž narod lij u'ccen minoritettne'kken. Miessi hâiddkiõllân lij sää'm'kiõll da hâiddpersonkåå'dd jie'nnkiõll lij sää'm'kiõll. Sää'm'kiõli puõ'ttiäi'j staanumu'sše lij vääžnai, što sää'mpäärna vuä'žže sää'm'kiõllsaž pei'vvhâaid da lââ'ssen pei'vvhâidd vuâd'dâv sää'mkulttuur äärvid. Päärnavui'm tuõjstõõllmen lij aabâs vää'žnai system'maatnalla ââ'nned sää'm'kiõl vä'lddkiõl ra'vves staattuuzâst huõlkâni. Miessi personkåå'dd lij o'nnstam tån tuâjast ooudâstjoo'ttjen, tøn diõtt ko personkåå'dd lij čõnnõõttâm tuâjes ou'dde. Näkam personkåå'dd čõnnõõttmõõžžin jiijjâz tuõjju da ra'vves sää'm'kiõl- da kulttuur määngbeällsaž da lue'žžjeei silttumuužžin leät čõõd'tum puki sää'mpäärnai kiõll'laž vuõiggâd'vuõd'id, lokku vää'ldel še tõid sää'mpäärnaid, koin sää'm'kiõl silttumuš lij leämmaž ää'p'tap. Si'tkkes tuâjain lij leämmaž vääžnai miârkk'tõs sää'm'kiõl seillmõ'sše, rämm miõlâst vuâitam tuõttâd, što vuâd'dškoou'le liâ puättam piirree'jji sää'm'kiõllsa škoolnee'kk', kook mätt'tâtte sää'm'kiõl le'be sää'm'kiõlin.

Sää'm'kiõlluâjj-ciist jorddmõš lij kaggâd ciist vuä'žžai pue'reed sää'm'kiõl ou'dde tuejjeem tuâi da kaggâd pukid Enontekiö kåå'dd da jee'res ve'r'gnee'kkid pue'reed sää'm'kiõl staattuuzz. Sää'm'kiõlluâjj ciist mie'ldd Enontekiö kåå'dd va'st'tõs sää'm'kiõllsaž kääzzkõõzzi ooudâsviikkmõõžžâst da ooudâsjuâtkkjumuužžâst lâssan.

Sää'mtee'g'g' kiõllsuávtõõzz saaggjää'dtee'jen tuäivam, što cistt kaagg'ci veâl jäänab Enontekiö kåå'dd pue'reed sää'm'kiõl staatuuzz ooudâsviikkmõõžž kåå'dd pukin vuä'ssvuu'din da še jee'res ve'r'gnee'kkid pue'reed sää'm'kiõllsaž kääzzkõõzzid.